

縣下有小江源出岵山。謂之岵浦。逕縣下。兩流注於浦陽。林山下注此浦。浦西通山陰浦。而達於江。江廣百丈。狹處二百步。高山帶江。重蔭被水。江闊漁商。川交樵隱。故桂棹蘭棹。望景爭途。江南有故城。太尉劉牢之討孫恩所築也。江水東逕上虞縣南。王莽之會稽也。本司鹽都尉治。地名虞賓。晉太康地記曰。舜避丹朱於此。故以名縣。百官從之。故縣北有百官橋。亦云。禹與諸侯會事訖。因相虞樂。故曰上虞。二說不同。未詳孰是。縣南有蘭風山。山少木多石。驛路帶山傍江。路邊皆作欄干。山有三嶺。枕帶長江。若若孤危。望之若傾。緣山之路。下臨大川。皆作飛閣。欄干乘之而渡。謂此三嶺爲三石頭。丹陽葛洪遁世居之。基井存焉。琅邪王方平。性好山水。又爰宅蘭風。垂釣於此。以永終朝。行者過之不識。問曰。賣魚師得魚賣否。方平答曰。釣亦不得。得復不賣。亦謂是水爲上虞江。縣之東郭外有漁浦。湖中有大獨小獨二山。又有覆舟山。覆舟山下有漁浦王廟。廟今移入裏山。此三山孤立水中。湖外有青山。黃山。澤蘭山。重岫疊嶺。參差入雲。澤蘭山頭有深潭。水色青綠。山中有諸塢。有石槌一所。右臨白馬潭。潭之深無底。傳云。創湖之始。邊塘屢崩。百姓以白馬祭之。因以名水。湖之南。卽江津也。江南有上塘。陽中二里。案二近刻隔在湖南。常有水患。太守孔靈符。過蜂山。前湖以爲塢。塢下開瀆。直指南津。又作水槌二。所以舍此江。得無淹潰之害。縣東有龍頭山。山崖之間。有石井。冬夏常冽清。泉南帶長江。東連上陂。江之道南。有曹娥碑。娥父盱。迎濤溺死。娥時年十四。哀父尸不得。乃號踴江介。因解衣投水。祝曰。若